

**TITU**  
**Pauru Nymerohpyry Titu**  
**Neneryme**  
**Tito**  
**Ekarotopo**

Juteu kara Titu kynexine. Jezu poetoryme toehse ynororo ahtao Pauru maro toytose pata tō poro, akorehmaneme (Karaxia 2.1-3; 2 Korītiu 7.6-16). Jezu poetory tō amorepaneme toehse ynororo Kereta po (Titu 1.5).

Tynymerohpyry ae Titu zurūko Pauru mana Jezu poetory tō amorepananō zae ehtoh poko; zurūko roropa mana zae Titu ehtoh poko imehnō Jezu poetory tō maro: tamuximākō amorepatohme, nuasemākō amorepatohme, kunumuxime exiketō amorepatohme, oryxime exiketō amorepatohme, enara. Tamuximehxo Titu exiryke imehnō akorehmapory se Pauru kynexine eya: “Kypynanopyatose Ritonōpo kure kuexirykōke pyra, kypyno xine toexiryke” (Titu 3.5).

**Sero pape ao**

Osekarotopo *1.1-4*

Jezu enetuputyry, zae ehtoh ipoetory tō maro  
*1.5–3.11*

Tuaro ehtoh etyhpyryme *3.12-15a*

Kure tyripotoh Ritonōpo a *3.15b*

<sup>1</sup> Ynymerohpyry moro oneneryme Titu. Ywy ase Pauru, Ritonōpo poetory, Jezu Kyrixtu nenyokhyppyry.

Tymenekase ywy Ritonõpo a tynymenekatyã akorehmatohme aomiry enetupuhpotohme eya xine, zae omi kurã poko toto amorepatohme roropa.

<sup>2</sup> Orihpỹme tymaro kyritorỹko Ritonõpo mana. Ajohpākara mokyro Ritonõpo. Pake nono onyripyra ro tahtao ynara tykase ynororo tyya rokene: “Orihpỹme ypoetory tō rĩko ase,” tykase.

<sup>3</sup> Mame tōmiry enehpory se toehse Ritonõpo ahtao tonehpose eya kyya xine. Tōmiry tokarose roropa ya ekarotohme imehnomo a, ynara katohme eya xine: “‘Umũkuru enetuputyryhtao oya xine, orihpyra oritorỹko ase, jũme,’ kaxiko eya xine,” tykase ya Ritonõpo kukurãkanekomo.

<sup>4</sup> Umũkurume mase Titu, Jezu Kyrixtu tone-tupuhse oya exiryke.

Ynara ãko ase Ritonõpo a: “Papa, Titu pyno ke exiko. Torētyke pyra tyriko roropa,” ãko ase. Jezu Kyrixtu a morara ãko roropa ase kukurãkanekõme exiryke.

### *Titu erohtopõpyry Kereta po*

<sup>5</sup> Kynomoase moroto ahmõta po Kereta po, morotõkõ akorehmatohme otyhkara ro jexiryke, Jezu poetory amorepatõkõ ritohme oya emero pata tō punero. Ynyrohmanohpotopõpyry poko oya wenikehpyra exiko.

<sup>6</sup> Zae rokẽ exiketõ Jezu poetory amorepaneme tyriko, toiro typye exiketõ rokene, Jezu enetupuhnanõ ke typoenõke rokene. Ajoajohpe pyra typoenõke exiketõ tyriko, tumykõ omipona typoenõke roropa.

<sup>7</sup> Ritonõpo omi poe Jezu poetory amorepananõ ahtao imehnõ mã toto onyhxiropyra kure rokẽ toto exiryke. Osenetaonohpyra exiketomo, atakirimahnomo, etỹpyra exiketomo, zehzehno pyra exiketomo, tyamene se pyra exiketomo,

<sup>8</sup> katonõ se exiketomo, kurãkõ maro se exiketomo, emotyẽkara exiketomo, zae rokẽ imehnõ rinanomo, Ritonõpo sã se exiketomo kure rokene, akĩme pyra exiketomo,

<sup>9</sup> zae omi onurumekara exiketomo zae exiryke, Jezu namorepatopõpyryme exiryke. Morara tah-tao xine imehnõ zurũko toh mana, toto akorehmãko zae Ritonõpo omi poe. Azahkuru exiketõ namorepatopõpyry enepõko roropa toh mana.

<sup>10</sup> Tuhke ajoajohpãkõ nae. Juteu tõ roropa Jezu enetupuhxĩpo toeramase ropa toto. Ipoetohpyryme mã toehse toto. Imehnõ amorepãko toto azahkuru rokene. Toto enekunohnõko mã toto.

<sup>11</sup> Mokaro imynyhpãkapoko imehnõ enekunopyryino. Tyekyrykõ omipohtomãko toh mana, zae pyra toto amorepãko, tineru apoitohme rokẽ tyaa xine.

<sup>12</sup> Typoko xine ynara tykase imepyny: “Kereta põkõ emero ajoajohpe mana osekatõ kõ samo. Akĩme roropa mã toto, tõtukurukõ poko emotyẽkãko toto,” tykase mokyro Kereta pono typoko xine ro imehnõ netaryme.

<sup>13</sup> Mokyro nekarohpyry ajohpe pyra mana. Morara exiryke mokaro zuruko orẽpyra samo, mãsa rokẽ pyra Ritonõpo omipona toto ehtohme.

<sup>14</sup> Juteu tamuru tõ omihpyry irumekapoko eya xine imeimehnõ nyrohmanohpotoh roropa. Zae omi rumekahpõkõ nyrohmanohpotoh

irumekapoko eya xine.

<sup>15</sup> Kure exiketō mā kure Ritonōpo nyrihpyry ekarōko. Yrome iirypyrymākō mā popyra Ritonōpo nyrihpyry ekarōko zae pyra toexirykōke. Tyrypyrykomo a rokē tuaro mā toto.

<sup>16</sup> Moro saaro imehnomo: “Ritonōpo waro ynanase,” āko toh mā repe. Yrome kure ehtoh poko pyra mā toto. Popyra ipunaka mā toto Ritonōpo neneryme. Imeimehnō zehno mā toto Ritonōpo omipona pyra. Kure imehnō riry waro pyra mā toto, enara.

## 2

### *Zae omi poko*

<sup>1</sup> Yrome omoro tyoro, mokaro sã pyra. Zae omi ekaroko Jezu poetory tomo a. Ynara kaxiko eya xine: “Ritonōpo omipona ehtoko,” kaxiko.

<sup>2</sup> Tamuhpomākō zuruko kure toto ehtohme, ajoajohpe pyra, emotyēkara roropa toto ehtohme tōtukurukō poko, māsa rokē pyra Ritonōpo enetupuhthohme toto a, imehnō pyno toto ehtohme, Ritonōpo omipona exiry poko penekehpyra roropa toto ehtohme.

<sup>3</sup> Morararo kunumuximākō zuruko kure toto ehtohme Ritonōpo poko exiketō samo, imehnō onykerekeremara toto ehtohme, eukuru jehnahpyry poko penetara toto ehtohme roropa. Zae omi poko imehnō amorepapoko eya xine.

<sup>4</sup> Oryximākō amorepapoko toto a, tyniokō pyno toto ehtohme, typoenōkō pyno roropa aehtohkōme,

<sup>5</sup> Ritonōpo omi poe tuaro toto ehtohme, imehnō orutua poko pyra oryxiã ehtohme, tytapyikō tao

rokē kure toto ehtohme, tyniokō omipona toto ehtohme roropa. Tyniokō omipona pyra Jezu poetory ahtao imehnō ynara āko toto eneryke tyya xine: “Otarāme Ritonōpo omiry se hkopyra mokyro mana,” āko toto ipoko.

<sup>6</sup> Nuasemākō roropa zuruko ajoajohpe pyra toto ehtohme.

<sup>7</sup> Titu, kure rokē imehnō tyriko, asā nuasemākō ehtohme. Zae imehnō amorepako Ritonōpo omiry poko. Onekunohto sā pyra exiko.

<sup>8</sup> Omi rypyry poko pyra exiko, ohxiropyra imehnō ehtohme. Morara awahtao kyzehnotokō ehxirōko tamoreme xine mana, ohxirory se exiketomo. Kure rokē oexiryke ohxiropyra mā toto.

<sup>9</sup> Ynara kaxiko namotome exiketomo a: “Oesēkō omipona ehtoko. Kure rokē erohtoko, oseosezuh-pyra roropa.

<sup>10</sup> Ematonara ehtoko. Kure rokē erohtoko. Morara awahtao xine ynara āko imehnō oenerykōke: ‘To! Tukurākanekō omipona rukuh mokaro toehse nahe,’ āko mā toto oenerykōke,” kaxiko eya xine.

<sup>11</sup> Ritonōpo kuamorepatose kure toexiry poko, kypyno xine toexiryke, emero porehme repe.

<sup>12</sup> Ynara kuamorepatorỹko mana, kyyrypyrykō rumekatohme kyaa xine, Jezu poetory tō kara penetatopōpyry rumekatohme roropa kyaa xine, zae kuehtohkōme kukurohtao xine, zae roropa imehnō neneryme kuehtohkōme, zae Ritonōpo neneryme kuehtohkōme roropa taro nono po.

<sup>13</sup> Morara kuexirykō se Ritonōpo mana. Tākye rokē sytatose Kuesēkō oepyry ropa eraximaryke

kyya xine. Orēpyra oehnōko ropa mana. “Kure Ritonōpo mana, kukurākanekō imehxo,” āko sytatose emero porehme, Jezu Kyrixtu oepyry ropa eneryke kyya xine.

<sup>14</sup> Mokyro tōsekarose toorihtohme kymyakākōme, kyjamihtanohtohkōme, kyyrypyrykō poko pyra kuehtohkōme, kukurohtao xine kukurikatohkōme roropa, ipoetoryme nymyry kuehtohkōme, māsā rokē pyra aomipona kuehtohkōme.

<sup>15</sup> Moro poko imehnō amorepako. Zuruko toto orēpyra, tyyrypyhpyke toehse toto ahtao. Ynara kaxiko eya xine: “Jomi poe rokē pyra ourutorỹko ase, Ritonōpo omi poe ourutorỹko ase,” kaxiko, ynara kara toto ehtohme: “Poetome ro mase. Ōmiry onetara ynanase,” kara toto ehtohme.

### 3

#### *Kure rokē Jezu poetory exiry poko*

<sup>1</sup> Ynara kaxiko roropa Jezu poetory tomo a: “Kowenu omipona ehtoko. Kowenu poetory omipona roropa ehtoko. Kure rokē erohtoko erohse oeahmarykohtao.

<sup>2</sup> Imehnō onykerekeremara ehtoko. Atatapoipyra roropa ehtoko. Sekerereme ehtoko imehnomo a, kure rokē imehnō ezuhtoko,” kaxiko.

<sup>3</sup> Pake ajoajohpākō sā sexiātose, Ritonōpo omipona pyra, popyra rokene. Jezu poetory tō kara penetatoh poko typenetase kymarokomo, tākye kuexirykō poko roropa typenetase imehnō zetū poko, imehnō zumoxike ehtoh poko roropa.

Imehnõ kyzehno xine toh nexiase. Toto zehno ynanexiase roropa.

<sup>4</sup> Yrome Ritonõpo kukurākanekõme mana. Kuamorepatose kypyno xine toexiry poko, kure kyrirykõ se toexiry poko roropa.

<sup>5</sup> Mame kypynanopyatose kure kuexirykõke pyra. Kypyno xine toexiryke kypynanopyatose iirypyryme ro kuahtao xine. Kurā Zuzenu a kukurikapoatose enurusenā sā ropa kuehtohkõme, kure kuehtohkõme kukurohtao xine.

<sup>6</sup> Omomyra Ritonõpo toehse. Tuzenu tokarose kyya xine, toorihse Jezu Kyrixtu exiryke kyyrypyrykõ epehpyryme.

<sup>7</sup> Tuzenu tokarose kyya xine zae kuehtohkõme. Kure rokē kyritorỹko Ritonõpo mana. “Zae matose,” āko Ritonõpo mana kyya xine. “Ymaro aarotorỹko ase orihpyra oehtohkõme jūme,” āko mana. Morara kary eraximāko sytatose eya.

<sup>8</sup> Morara kary ajohpe pyra mana.

Morara exiryke orēpyra exiko moro ekarory poko Ritonõpo enetupuhnanomo a kure rokē imehnõ ritohme toto a. Morara ahtao kure sytatose Ritonõpo neneryme, imehnõ neneryme roropa.

<sup>9</sup> Yrome putupyra exiketõ oseosezukuruhntao anaponuhpyra exiko tytamurukõ esety poko, Moeze omihpyry poko roropa toto oseosezukuruhntao toto anaponuhpyra exiko. Toipāme rokē sekere āko mā toto.

<sup>10</sup> Imehnõ azahkuru Jezu poetory amoreparyhtao zuruko toto osemazuhme aporo. Morotoino amorepazomoko ropa toto. Morarame õmipona

pyra toto ahtao imaro xine pyra exiko.

<sup>11</sup> Zuaro mase toto osenekunopyry waro mase. Iirypyryme toto exiry eneryke oya zae pyra toto exiry waro mase.

*Pauru nurutopõpyry etyhporyme*

<sup>12</sup> Arytema aropõko ase oya. Arytema pyra ahtao Tikiku aropõko ase aarotohme, Nikopori pona. Moroto exiiko ase ikonopory ae.

<sup>13</sup> Zena makorehmatase, Aporu maro ooepyryhtao. Zena, Roma kowenu omiry waro exikety. Akorehmako toto tÿkyryneke toto ehtohme toto ytoryhtao.

<sup>14</sup> Imehnõ akorehmapoko roropa Jezu poetory tomo a etuarimaketõ pyno toto ehtohme, toipãme rokẽ pyra toto ehtohme.

<sup>15</sup> “Kure pãna mã moero,” ãko oya ymarõkomo. Morara ãko roropa ase amarokomo a, yna pyno exiketomo a, Jezu poetory tomo a.

“Papa, Titu tõ pyno exiko,” ãko ase Ritonõpo a. Enara rokene.



្ក  
**Khmer Standard Version of the Holy Bible in  
the Khmer Language of Cambodia**

Copyright © 1997, 2005 The Bible Society in Cambodia

្ក

© រក្សាសិទ្ធិដោយសមាគមព្រះគម្ពីរសកល

គ្រប់ ផ្នែក នៃ សៀវភៅ នេះ មិន ត្រូវ បាន ផលិត ឬ ប្រើប្រាស់ តាម ទំរង់ ឬ មធ្យោបាយ បែប អេឡិចត្រូនិក ឬ ម៉ាស៊ីន ណាមួយ រួម ទាំង ការ ថត ចំលង អាត់ សំលេង ផ្ទុក នូវ ទិន្នន័យ ប្រព័ន្ធ ណាមួយដែលអាចយកមកប្រើ ដោយគ្មានការអនុញ្ញាតពីសមាគមព្រះគម្ពីរកម្ពុជា។ ប្រសិនបើ មានការដកស្រង់អត្ថបទគម្ពីរចាប់ពី ១០០០ខ ឡើងទៅ ត្រូវសុំការអនុញ្ញាតពីសមាគមព្រះគម្ពីរ កម្ពុជ

Quotations of the Bible in Khmer Standard Version in any form, must obtain written permission from the Bible Society in Cambodia if the quoted material is inclusive of at least 1,000 verses, or a copy of any book wholly or partially, which amounts to 50% of the book quoted. For any long quotation, notice of copyright must appear as follows: Text copyright © 1997, 2005 United Bible Societies. Used by permission.